

खबरां

- अपने त्रै देशें भारत-प्रशांत दौरे दी शुरूआत करदे होई प्रधानमंत्री नरेंद्र मोदी होर इंडोनेशिया दे जर्काता च पुज्जे।
- सहकारिता मंत्री अमित शाह होरें आखेआ, सुधारें, डिजिटीकरण ते बवसायिक प्रबंधन राएं सहकारी मुहिम विस्तार दे नमें चरण च प्रवेश करा'रदी ऐ।
- मुम्बई महानगर च भारी बरखा करी आम जीवन प्रभावित, पस्सी पौने करी मुम्बई पुणे एक्सप्रेस-वे पर ट्रैफिक पर असर। मौसम विभाग नै मध्य महाराष्ट्र, गुजरात, गोवा ते छत्तीसगढ़ दे किश हिस्सें च अज्ज खरी मती बरखा बने दे सरबंध च रेड अलर्ट जासरी कीता ऐ।
- काइव पर रूस दे मिसाइल हमले च 10 लोक मारे गए ते 46 घायल होए न।
- मेस्को पर 3-2 कन्नै जित्त हासल करिये इंग्लैंड फीफा विश्व कप क्वार्टर फाइनल च पुज्जी गेआ।
- ते विबलंडन टेनिस च नोवाक जोकोविक नै रूस दे रोमान सेफिउलीन गी हराइये पुरूषें दे एकल क्वार्टर फाइनल च थाहर बनाई, नोआमी ओसाका विश्व दी नंबर 1 खडारी एरिना साबालेंका गी हराइये महिलाएं दे एकल क्वार्टर फाइनल मुकाबले च पुज्जी गेइयां न।

<><><><><><>

PM-Foreign Visit

प्रधानमंत्री नरेंद्र मोदी होर इंडोनेशिया, आस्ट्रेलिया ते न्यूजीलैंड दे अपने 6 रोजा दौरे लेई रवाना होई चुके दे न। दौरे पर जाने कोला पैहले अपने बयान च प्रधानमंत्री होरें आखेआ जे उंदा इंडोनेशिया, आस्ट्रेलिया ते न्यूजीलैंड दा दौरा भारत दी एकट ईस्ट नीति, महासागर धेइऐ दे कन्नोकन्नी मुफ्त ते मुफ्त भारत प्रशांत बक्खी देश दा नजरिया बी मजबूत करोग। प्रधानमंत्री मोदी होरें आखेआ जे उंदे इंडोनेशिया दौरा विस्तृत रणनीति सांझेदारी गी होर गूढा करोग जेड़ी 2018 च मजबूत होई ही ते राष्ट्रपति प्राबोबो होर भारत दे गणतंत्र दिवस 2025 च मुख परौहने दे तौरा पर शामिल होए हे। अपने दौरे दरान प्रधानमंत्री होर उत्थे रवारदे भारती समुदायें कन्नै बी मिलंगन तेराश्ट्रपति प्राबोबो हुंदे कन्नै योग्यकर्ता च प्रमबानन मंदर बी जांगन। इंडोनेशिया थमां प्रधानमंत्री मोदी होर आस्ट्रेलिया दे प्रधानमंत्री एंथनी एलवनीज हुंदे सादे पर मेलबार्न जांगन। मोदी होरें आखेआ जे इस दौरे करी भारत आस्ट्रेलिया विस्तृत रणनीतिक सांझेदारी, रक्षा ते सुरक्षा, बपार ते निवेश, शिक्षा ते जरूरी तकनीकें पर चर्चाएं राएं मजबूत होग। प्रधानमंत्री होर उत्थे रवा रदे भारतीयें कन्नै बी मिलंगन। एहदे बाद प्रधानमंत्री क्रिस्टोफर लक्जन हुंदे सादे प आकलैंड जांगन। इस दौरे कन्नै दवें देशें बश्कार दपक्खी रिश्ते गी रफ्तार थहोग।

<><><><><><>

HM-Coop. Movement

केंद्री गृह ते सहकारिता मंत्री अमित शाह होरें अज्ज आखेआ जे सहकारिता, मुहिम सुधारें, डिजिटीकरण ते बवसायिक प्रबंधन दे जरिए विस्तार दे नमें चरण च प्रवेश करा'रदी ऐ। सहकारिता मंत्रालय दे 5में स्थापना समारोह च अपने संबोधन च शाह होरें आखेआ जे हर क्षेत्र च सब्बनें शा शैल कम्म करने आहली 5 सहकारिता सोसायटीज दी पंदान करने आस्तै ओह्दे दा वर्गीकरण कीता जाह्ग। गृह मंत्री शाह होरें पिछले 5 बरें च सहकारिता राएं खुशहाली मंत्र दी अपनादे होई करोड़ें लोकें दी जिंदगी च बदलाव आहनेने आस्तै सहकारिता मंत्रालय दी प्रशंसा कीता ऐ।

<><><><><><>

Spl. Trains Jagannath Yatra

रेल मंत्री अश्विनी वैश्वणव होरें आखेआ ऐ जे इस बरे भगवान जगननाथ हुंदी रथ जात्तरा लेई 300 खास रेल गड्डियां चलाइयां जांगन। पैहले थमां चला'रदियां 800 ट्रेनें दे अलावा एहू ट्रेनां बादू ना नमीं दिल्ली च अज्ज संवाददाताएं कन्नै गल्लबात करदे होई वैश्वणव होरें आखेआ जे ओहू औंदी रथ जात्तरा लेइयै रेलवे बक्खी कीती गेदी तैयारिएं दा अज्ज जायजा लैंगन। पूरी च विश्व प्रसिद्ध रथ जात्तरा लेई तैयारियां जोरें कन्नै चला'रदियां न, ओडिशा सरकार पूरी चाल्ली इस भव्य आयोजन लेई तैयार ऐ। ओडिशा दे मुखमंत्री मोहन चरण मांझी होरें सारे विभागें गी सुरक्षित, बिजन कुसा गलती दे रथ जात्तरा आयोजित करने दे निर्देश दित्ते न जेदे आस्तै विभागें दा आपसी तालमेल, हर प्रबंध दी बेहतरीन तैयारी जरूरी ऐ।

<><><><><><>

Maharashtra-Monsoon

महाराष्ट्र दा मता हिस्सा लगातार बरखा दी मार झल्ला'रदा ऐ। मुम्बई ते कोंकण क्षेत्र च हाड, जमीन धस्सने, ईमारतें दे नष्ट होने दे हालात बने दे न। शिडक रेल ते ब्हाई जाताजात च माडा असर पेआ ऐ। पूरे राज्य च प्रशासन हाई अलर्ट पर ऐ कीजे बरखा पूरे-पूरे दिन जारी रौहने दी मेद ऐ। लोकें गी अपील कीती गेई ऐ जे ओहू गैर जरूरी सफर नेई करन। मुखमंत्री देवेन्द्र फडनवीस होरें हालातें दा जायजा लैता ते पूरे प्रशासन गी तालमेल कन्नै तुरत प्रतिक्रिया देने दी हिदायत कीती। मुम्बई च तेज बरखा कन्नै 80, 90 किलोमीटर प्रति घंटे दी रफ्तार कन्नै अंधी झुल्लने करी गड्डियें, ट्रेनें ते डोआरिएं पर बी असर पेआ ऐ। बीएमसी नै गैर जरूरी सरकारी अमले आस्तै अद्धी छुट्टी घोशित करी दित्ती ऐ। नीति सेक्टर गी सलाह दित्ती गेई ऐ जे वर्क फ्राम होम यानि घरा कम्म करने दी पालमा कीती जा। पुणे ते तटीय जिलें च सारे सरकारी निजी स्कूल ते कालेज अज्ज बंद रेया। तोआई, भारती मौसम विभाग नै गुजरात, कोंकण, गोवा, मध्य महाराष्ट्र ते छत्तीसगढ़ च अज्ज खरी मती बरखा पौने दे सरबंध च रेड अलर्ट जारी कीता ऐ। मौसम विभाग दा आखना ऐ जे दक्खन पच्छमी मानसून नै उत्तरी अरब सागर, गुजरात, हरियाणा ते पंजाब दे बचे दे हिस्से ते राजस्थान दे किश हिस्से च अगले त्रै दिनें दरान बदने दे असार न।

<><><><><><>

Weather

मौसम विभाग ने अगले त्र'उं दिनें दरान जम्मू-कश्मीर दे मते सारे हिस्सें च हौली थमां दरम्याने दर्जे दी बरखा ते गरज-चमक दी भविष्यवाणी कीती ऐ। इस दरान किश थाहें पर भारी बरखा दे असार बी दस्से गे न जिस करी मुकामी सतह पर चानचक्क हाड़ औने जां ल्हास-पस्सियां पौने दा खतरा बी पैदा होई सकदा ऐ। आकाशवाणी दे जम्मू संवाददाता दी रिपोर्ट मूजब, मौसम विभाग ने इब्बी जानकारी दित्ती ऐ जे अज्ज मुख करियै चिरे दपैही, सं'झां'लै ते चिरे रातीं बी केई थाहें पर इक जां द'उं बारी गरज-चमक दे कन्नै हौली थमां दरम्याने दर्जे दी बरखा बरी सकदी ऐ। इ'आं गै किश थाहें पर मौलेधार बरखा जां किश चिरै लेई तेज ते भारी बरखा दे असर बी हैन।

<><><><><><>

Ukraine Killings

यूक्रेन च रूस आसेआ राजधानी काइव पर अज्ज बडुलै मिसाइल हमले च 10 लोकें दी मौत होई गेई 46 दुए घायल होई गए न। तूर्की च होने आले मुख नाटो सम्मेलन दे 1 रोज पहले एह हमला होआ जेदे च अमरीकी राष्ट्रपति डोनल्ड ट्रम्प हुंदे शामिल होने दी मेद ऐ। यूक्रेन दी वायु सेना दा आखना ऐ जे रूस नै हमले च बेलिस्टिक मिसाइलां, क्रूज मिसाइलां ते ड्रोनें दा इस्तेमाल कीता। ताजा हमला उसलै होआ जिसलै यूक्रेन दे राष्ट्रपति व्लादिमीर जेलेन्सकी होरें चेतावनी दित्ती ही जे खुफिया सूचना मूजब रूस इक बड्डे हमले दी तैयारी करा'रदा ऐ।

<><><><><><>

NTA

राष्ट्री परीक्षा एजेंसी नै नीट अंडरग्रेजुएट 2026 मतेयान दी फीस वापसी लेई बैंक खाता डिटेल्स अपडेट करने दी समें-सीमा इस म्हीने दी 7 तरीक तगर बधाई दित्ती ऐ। सोशल मीडिया पर इक पोस्ट च एनटीए नै जानकारी दित्ती ऐ जे जिनें मेदवारें अपने बैंक खाता डिटेल्स दी तस्दीक करी दित्ती ऐ, उंदे लेई रिफंड आली प्रक्रिया शुरू होई गेदी ऐ। एनटीए नै दस्सेआ जे हुनै धोड़ी छड़ा 8 लख 29 ज्हार 510 मेदवारें गै अपने बैंक डिटेल्स च सुधार जां अपडेट कीता ऐ। कोशन पेपर लीक होने दे आरोपें मगरा इस बरे 3 मई गी आयोजित मतेयान रह दे बाद एनटीए आसेआ रिफंड प्रक्रिया चलाई जा'रदी ऐ।

<><><><><><>

RS-Bypolls

चुनांऽ आयोग नै पच्छिम बंगाल थमां राज्यसभा दी 3 सीटें लेई उपचुनाएं दी घोशणा करी दित्ती ऐ। एह सीटां राज्यसभा सदस्य सुखेंदु शेख राय, सुष्मिता देव ते प्रकाश चिक बैरेक दे इस्तीफे दे बाद खाली होइयां हिआं। चुनांऽ दी अधिसूचना कल जारी कीती जाह्ग जिसलै के नामांकन दाखल करने दी खीरी तरीक 14 जुलाई ऐ। नामांकन पत्रें दी जांच 15 जुलाई गी होग। इनें सीटें लेई मतदान 24 जुलाई गी होग ते मतगणना बी उसै रोज होग।

<><><><><><>

अज्ज स्विटजरलैंड दे जेनेवा च उपभोक्ता बचाव कनून ते नीति बारै होआ'रदे विशेषज्ञें दे अंतर सरकारी 9में सत्र दी अध्यक्षता भारत करोग। स्हाड़े संवाददात नै जानकारी दित्ती ऐ जे 3 दिनें दे सत्र दा आयोजन संयुक्त राष्ट्र दे बपार ते विकास इकाई आसेआ कीता गेआ ऐ जेड़ा बुधवारें धोड़ी चलोग। उपभोक्ता मामलें, खाद्य ते लोक वितरण मंत्रालय नै दस्सेआ ऐ जे इस सत्र राएं सदस्य मुख अंतरराष्ट्री संगठन, उपभोक्ता बचाव प्राधिकरण, बुद्धिजीवि ते दुए हितधारक कट्टे होंगन ते उपभोक्ता बचाव कनून ते नीति बारै मसलें पर चर्चा दा मौका मिलोग। विशेषज्ञें दा अंतर सरकारी ग्रुप इस बारै चर्चा कराने ते सहयोग कट्टा करने आहला मुख जरिया ऐ। उपभोक्ता मामलें दे विभाग दी सचिव निधि खरे होर सत्र दी अध्यक्षता करंगन।

<><><><><><>

ABHA

सरकार नै आखेआ ऐ जे 104 करोड़ शा मते सेहत कार्ड 93 करोड़ शा बद् आयुष्मान भारत स्वास्थ्य खाता आभा कन्नै जोड़े गे न। एह देशै दी डिजिटल सार्वजनिक सेहत प्रणाली आली बक्खी इक महत्वपूर्ण पैहलकदमी ऐ। आभा आधार कार्ड आंगर लेखा 14 अंके दी बशेष पंछान ऐ जेड़ी लोके गी व्यापक सेहत प्रणाली कन्नै सुरक्षित रूप कन्नै जोड़दी ऐ। एहदे कन्नै मरीजे गी डिजिटल सेहत सेवाएं तगर पुज्जना ते बीमा कंपनियें अस्पतालें, डाक्टरें ते होर दुइयें सेवाएं कन्नै जुड़ने च सखाल होई जंदी ऐ।

<><><><><><>

FIFA-WC

मैक्सिको दे एजटीका स्टेडियम च इंगलैंड नै मैक्सिको गी 3-2 कन्नै हराइये फीफा विश्व कप क्वार्टर फाइनल च थाहर बनाई लैती ऐ। इक दुए मैच च ब्राजील दी खडारी नेमार जुनियर नै अंतरराष्ट्री फुटबाल थमां सन्यास लैने दी घोशणा कीती। 5 बारी विश्व चैंपियन रेदे नेमार नै फीफा विश्व कप राएंड आफ 16 च नारवे कोला 271 कन्नै हारने मगरा एह घोशणा कीती।

<><><><><><>

Wimbledon

विंबलडन टेनिस च सर्बिया दी नोवाक जोकोविक नै जंदी रातीं रूस दी रोमान सेफियूलीन गी हराइये मर्दे दे एकल क्वार्टर फाइनल मुकाबले च थाहर बनाई लैती ऐ। जोकोविक दा अगला मुकाबला फेलिक्स आगर एलिआसिमे जा एलेजेंड्रो डेविडोविच फोकिना कन्नै क्वार्टर फाइनल च होग। इक दुए मुकाबले च नोआमी ओसाका नै दुनिया दे नंबर 1 खडारी एरिना सवालेंका गी 6-2, 7-6 कन्नै हराइयै पैहली बारी क्वार्टर फाइनल धोड़ी पुज्ज बनाई ऐ।

<><><><><><>

Sheetal Para Archery

जम्मू-कश्मीर लेई इक्क ऐतिहासिक क्षण उसलै बनेआ जिसले दुनिया दी नंबर इक्क पैरा तीरंदाज शीतल देवी नै बैकाक च होई दी विश्व पैरा तीरंदाजी श्रृंखला च इक सुन्ने दा, इक चांदी दा ते इक कैंस दा

तगमा हासिल कीता। शीतल देवी नै मिक्स्ट टीम इवेंट च सुन्ने दा, काम्पाउंड च चांदी दा ते महिला टीम च कैऽ दा तगमा जित्तेआ। अपने बिचार सोशल मीडिया राएं जाहिर करदे होई शीतल देवी नै आखेआ जे भारत दी जर्सी लाना म्हेशां गै मानै आहली गल्ल हुंदी ऐ। भारत नै इस प्रतियोगिता च 16 तगमें जित्ते जेदे च 7 सुन्ने दे, 5 चांदी दे ते 4 कै दे तगमे शामिल न।

<><><><><><>

Amarnath Pilgrims

जम्मू दे भगवती नगर आहले आधार शिविर थमां अज्ज बडुलै श्री अमरनाथी जी यात्रा दा 5मां जत्था सख्त सुरक्षा बंदोबस्तें हेठ रवाना होआ। पुलिस कंट्रोल रूम मुजब 265 गड्डियें दे काफियें च सोआर 5 ज्हार 794 श्रद्धालु बालताल ते पहलगाम लेई रवाना होए। इन्दे च 2 ज्हार 304 श्रद्धालु बालताल लेई ते 3 ज्हार 410 श्रद्धालु पहलगाम लेई रवाना होए। कुल 5 ज्हार 794 श्रद्धालुएं च 3 ज्हार 887 मर्द, इक ज्हार 211 महिलां, 20 बच्चें, 599 साधु, 76 साध्वियां ते इक हौली उमरी दा साधु शामिल ऐ।

<><><><><><>

POJK-People Appeal

पाकिस्तान दे कब्जे आले जम्मू-कश्मीर दे लोक भारत सरकार कोला मदद मंगा'रदे न जेदे कन्नै एह पता लगदा ऐ जे उत्थे संकट किन्ना गैहरा ऐ। पीओजेके च बरोध-प्रदर्शन इक्क म्हीने थमां जारी न। इक अधिकारी नै दस्सेआ ऐ जे हालात गंभीर न ते पीओजेके दे लोक भारत थमां दोआइयां ते जरूरी चीजें दी आपूर्ति चाहंदे न। एहदे कन्नै उस खेत्तर च इंसानें दे जीने दे हालातें दा पता लग्गदा ऐ। फील्ड मार्शल आसिम मुनीर दी हिदायतें पर पिछले 20 दिनें थमां इस क्षेत्र धोड़ी राशन ते दोआइयें दी आपूर्ति बंद ऐ। लोकें कश खाने-पीने आस्तै नेई ऐ ते बरोध-प्रदर्शन दरान घायलें दा ईलाज बी नेई कीता जा'रदा ऐ। पैहले राशन दी आपूर्ति बंद कीती गई, मगरा दोआइयां बंद करी दित्तियां गेइयां जेदे कन्नै हालात बद थमां बदतर होई गए न।

<><><><><><>

Candle March Poonch

बक्ख-बक्ख संगठनें दे कार्जकर्ताएं जंदे रोज पुंछ दे परेड पार्क च किट्टे होइयै पाकिस्तान दे नजैज कब्जे आले जम्मू-कश्मीर च पाकिस्तान प्रशासन दे अत्याचारें दा सामना करा'रदे लोकें दा समर्थन करने लेई शांतिपूर्ण तरीके कन्नै कैंडल मार्च दा आयोजन कीता। हत्थें च मोमबत्तियां फड़े दे लोकें पी.ओ.जे.के दे बसनीकें लेई न्याऽ, सम्मान ते बुनियादी अधिकारें दी राखी हिफाजत लेई नारे लाए। लोकें शांतिपूर्ण तरीके कन्नै बरोध करा'रदे पीओजेके दे बसनीकें पर कथित कार्रवाई खत्म करने दा आह्वान कीता ते कब्जा रेखा दे उस पार रवा'रदे लोकें दियें मंगें दा समर्थन कीता।

<><><><><><>

Flash Floods

रात भर लगातार भारी बरखा कारण आए दे हाड़ करी डोडा-किश्तवाड़ जरनैली शिड़के गी नुकसान पुज्जा ऐ जेदे करी गड़ियें दी आओजाई प्रभावित होई ऐ। इन्ना गै नेई किश्तवाड़ जिले च बनाए जा'रदे 540 मेगावाट छमता आहले द्वार पन बिजली परियोजना परिसर च पानी किट्टा होई गेआ। हाड़े दे मगरा जरनैली शिड़कै पर बड़ी मती मात्तरा च मिट्टी ते मलबा किट्टा होई गेआ जेदे करी केई गड़ियां मलबे हेठ दबोई गेइयां। प्रेम नगर च शिड़कै दे कंडे खड़ोती दियां केई गड़ियां बी मलबे च फंसी गेइयां। अधिकारियें जानकारी दित्ती ऐ जे कोई बी जान माल दे नुकसान जां कुसै दे बी जखमी होने दी कोई खबर नेई ऐ। इस बारै होर जानकारी दिंदे होई डोडा दे डिप्टी कमिशनर कृष्णन लाल होरें आखेआ

तोआई, किश्तवाड़ जिले च द्वार पन बिजली पनिरयोजना परिसर दे कोल सुरंग आले इलाके च भारी बरखें करी पस्सियां पौने दी खबर बी सामने आई ऐ। केंद्री मंत्री डा. जितेंद्र सिंह होरें इस बारै जम्मू दे डिविजनल कमिशनर रमेश कुमार हुंदे कन्नै गल्लबात करियै हालात दी जानकारी हासिल कीती। उनें दस्सेआ जे कुसै बी चाल्ली दे जानी जां माली नुकसान दी कोई खबर नेई ऐ ते परियोजना सरबन्धी मशीनें ते होर दुए समेयान गी सुरक्षित ढंग्गै कन्नै उत्थुआं हटाइयै दुई थाहर पजाई दित्ता गेआ ऐ।

<><><><><><>